

ILUARSIISSUT

(Taarserpaa inatsisissatut siunnersuut 11. August 2016-imeersoq)

Uunga siunnersuut: Atuarfik pillugu Inatsisartut inatsisaata allanngortinneqarnera Inatsisartut Inatsisaat nr. xx, xx.xx 2016-imeersoq
(Ilinniartitaanermut, Kultureqarnermut, Iisimatusarnermut Ilageeqarnermullu Naalakkersuisoq)

Saqqummiussissut**Siullermeerneqarnera**

Atuarfik pillugu Inatsisartut inatsisaata allanngortinneqarnissaanik Inatsisartut inatsisissaattut siunnersuut matumuuna Naalakkersuisut sinnerlugit saqqummiuppara.

Siunnersuuteqarnermi siunertarineqarpoq meeqqat atuarnerannik atugarissaarnissaannillu soqutigisaqaannanngitsunik aammali meeqqat atuarfiata ataatsimut isigalugu ineriartornissaanik soqutigisaqartunik angajoqqaat aallartitaqarfigisassaannik pilersitsinissaq.

Siunnersuut meeqqanut atuarfimmiittunut angajoqqaajusut maannamut namminneq kattussimanginnerat taamaalillutillu ullumikkut ataatsimut oqaaseqartitsisannginnerat tunngavigalugu isigineqassaaq. Siunnersuummi taamaammat siunertaavoq atuarfeqarnermi apeqqutit pingaaruteqartut pillugit angajoqqaat isumaannik ataatsimut nalunaaruteqarfissaannik pilersitsinissaq. Tamanna assersuutigalugu malittarisassat nutaat il.il. pillugit siunnersuutit tusarniutigineqarnerannut atatillugu pisinnaavoq aammali allanut tunngasinnaalluni. Aammattaaq nalunaaruteqartarfik taanna nuna tamakkerlugu siunnersuisoqatigiit angajoqqaat isumaannik pisariaqartumik saqqummiisarfiusinnaavoq isiginninniartitsilersinnaallunilu, ilaatigut ingerlatsisutut allatuulli sunniuteqarsinnaatigaluni atuarfiup ineriartornera pillugu oqallinnermi peqataasinnaanermut tunngatillugu.

Tamassuma saniatigut siunertaavoq angajoqqaanik nuna tamakkerlugu kattutsitsineq meerartatta siunissami atuarnissaat atugarissaarnissaallu pillugu oqallittarnerit pitsaassusilernissaannut allanngorartuunissaannullu tapersiissasoq. Ilaatigut ilimagineqarpoq atuarfiup pitsaassusaanut tunngatillugu eqeersimaarluni kinguneqartussamillu oqallinnernut siunnersuisoqatigiit peqataasarneratigut tamanna pissasoq, tassunga ilanngullugu meeqqat atuarfianni suliaqarnerup aaqqissuunnerani naleqqutinngitsunik suliniutaasinnaasut uparuartarnissaannut aaqqiissutissanillu siunnersuuteqartarnissamut tunngatillugu.

Peqatigitillugu eqqarsaataavoq atuarfimmi meeqqanut perorsaanermilu suliaqarnermut tunngatillugu angajoqqaat peqataanerullutik ataavarnerusumillu iliuuseqartarnissaannut siunnersuisoqatigiit aamma qulakkeerinnissinnaassasoq.

Soorlu inatsisissatut siunnersuummut oqaaseqaatini allaqqasoq, meeqqat atuarfiannut angajoqqaat nuna tamakkerlugu siunnersuisoqatigiit pilersinneranut atasunik aningaasartuuteqassaaq. Erseqqissassavara aningaasanut inatsisissatut siunnersuutip suliarinerani aningaasanullu inatsisissatut siunnersuummi aningaasartuutissatut iluanni suliniutip taassuma aningaasalersornissaa pillugu Naalackersuisut siunnersuummik soorunami saqqummiussissasut.

Taamatut oqaaseqarlunga matumuuna siunnersuut Inatsisartunut akuersaartumik suliarisassanngorlugu tunniuppara.
sinaakkutit